

Te Kaupapa o The Le@rning Federation (TLF)

Whakamārama

He kaupapa tēnei kua ara ake i te hononga tahi a ngā kāwanatanga o Ahitereiria me Aotearoa. Ko te whāinga matua, he whakawhanake, he whakaputa i ētahi kohinga akoranga rorohiko kouna tonu, e arotahi ana ki ngā tini kaupapa o te pāngarau, o te pānui/tuhituhi (mā te ākonga e taka whakamuri ana), o te pūtaiao, me ngā reo kē atu i te Ingarihi.

Nō te tau 2002 i whakatūria te rōpū tohutohu, nā rātou i arotake ngā akoranga rorohiko pāngarau 30 i roto i te reo Ingarihi, ā, ka āta whiriwhiri anō i te whaihua o te huri i aua akoranga ki te reo Māori. Ka tino kitea e te rōpū nei ngā painga o tēnei rauemi mā te ākonga o roto i ngā kura reo Māori, engari ka tohua anō hoki ngā wāhi hei whakapai ake, hei tāpiri atu rānei, kia tino hāngai ai ki te kura reo Māori. Nā runga i te whakatau a te rōpū, ka tīmata ngā mahi whakahou i ngā akoranga rorohiko 30. Ka whakapaipaihia ētahi o ngā whakairoiro, ka tāpirihia atu he reo hei whakarongo mā te ākonga me ētahi whakaari hou, engari ka mau tonu te kaupapa o ngā akoranga i roto i te reo Māori. Ka whakamātauria ngā akoranga reo Māori nei i roto i ētahi kura, ā, ka whakahoutia anō ētahi wāhanga i runga i te āhua o ngā whakahoki kōrero a ngā ākonga me ngā pouako.

Ētahi pae tukutuku e whai pānga ana

<http://www.nzmaths.co.nz/maori/index.htm>

<http://www.tki.org.nz/e/community/math/>

Te whakamātau i ngā akoranga rorohiko

Kei te tukuna te kōpae *Pāhekoheko Tau Matihiko* ki a koutou, ngā kaitakawaenga o Te Poutama Tau, ā, ka huaki anō i te kūaha kia uru mai koutou ki Te Pātaka Matihiko Our Digital Storehouse (<http://www.tki.org.nz/r/digistore/>).

Ka haere hoki te tonu, mā koutou anō e whakamātau te kōpae nei mō te ono marama, i roto i ngā akomanga e whai ana i te kaupapa o Te Poutama Tau. Ko ngā whakahokinga kōrero hei āwhina i te tukuna o te kōpae ki ngā kura reo Māori whānui o te motu.

Te whāinga o te whakamātautau

Ki te tohutohu mai i Te Tāhuhu o te Mātauranga:

- mēnā ka haere tonu te mahi whakahou i ētahi atu o ngā akoranga rorohiko reo Ingarihi (neke atu i te 200 ngā akoranga reo Ingarihi), mēnā ka whakawhanake i ētahi akoranga rorohiko reo Māori motuhake, ko ēnei mahi e rua rānei
- he aha ngā wāhi o roto i te pāngarau, o roto rānei i tētahi atu kaupapa ako matua hei whakawhanake i tētahi akoranga rorohiko
- he aha ngā rauemi kua puta kē ki ngā kura (rauemi matihiko, rauemi kē atu rānei), hei tautoko i ngā mahi o tēnei kōpae
- he aha ētahi atu rauemi me whakaputa, hei tautoko i te whakamahinga o tēnei kōpae i roto i ngā kura reo Māori.

Te wāhi ki ngā kaitakawaenga o Te Poutama Tau

Ki:

- te whakatenatena, te whakamanawa i ngā pouako ki te whakauru i ēnei akoranga rorohiko ki roto i ā rātou mahere ako
- te whakahoki kōrero mai ki Te Tāhuhu o te Mātauranga mō:
 - te whaihua o tēnei rauemi
 - te āhua o ngā rauemi tautoko ka haere i te taha o tēnei kōpae ina tukuna ki ngā kura reo Māori whānui
 - ngā wāhi o roto i te pāngarau, o roto rānei i tētahi atu kaupapa ako matua hei whakawhanake i tētahi akoranga rorohiko.